

Pablo lelpox carta Titoliajwa

Pablo lelpox carta Titoliajwa

1 Xan Pablo nabistax Diosliajwa. Xanbej Jesucristo pej-apóstolan. Dios nato'a kajachawaesliajwan Dios makanochpi, japi naexasisliajwa Jesús pejwñajan. Ja-an wut, japi matabija xatis Jesús pejwñajan naexasichpox, diachwñajnakolaxpox. **2** Samata, japi jiw naexasisaxael Jesús pejwñajan pomatkoicha duilaliajwapi Diosxotse. Chajiakolaxtat Dios ampathat is-el wutfuk, jumduton jiw pomatkoicha duilaxaelpox japonxotse. Dios kichachajba-el. **3** Dios chajia markpox, matkoi, amwñtjel patlisox xatis matabijaliajwas Jesús pejwñajan. Dios, nakbñ'weyaxaelpon xatis, japon xan nato'a jiw naewñajnalijwan chimiawñajan, Jesucristo pejwñajan. **4** Tito, xam taxñnam wut, ja-am xanliajwa, Jesús pejwñajan naexasitam xot. Samata, lelx amprox carta xamliajwa. Waj-ax Dios, Jesucristobej, kawñajñax xam beltaeliajwapi, kajachawaesliajwabeb, chiekal dukaliajwam, asew jiw swapich.

Pablo to'apox Tito namanaliajwa Creta tanaetxot, isliajwapon Dios pejbichax

5 Tito, xam chajia to'ax namanaliajwam Creta tanaetpijwaxot we'ppoxfuk chiekal toesliajwam. To'axbej kaenanñla paklowaxanxot makanosliajwam ancianos, japi tato'laliajwa Jesús pejwñajan naexasiti japapaklowaxanxot. Chajia xam jum-an, masi poejiw xam makanosaxaelam ancianosliajwa. **6** Xam makanosaxaelampi jiw ancianosliajwa, japi jiw chiekal pachaempi asew jiwliajwa. Japi tasala-esalpibeb, babijaxan is-el xot. Kaenanñla japibeb pijowpi. Japi paxibeb, chiekal naexasiti Jesús pejwñajan. Japi paxibeb bñ'wñajanjilpi. Japi paxibeb chiekal naexasichpi,

naewuajnas wut. **7** Xam makanosaxaelampi ancianosliajwa, japi tato'lialiajwa Jesús pejwuajan naexasiti, japi jiw chiekal nabichaxael Diosliajwa. Samata, xam makanosaximil jiw, babijaxan ispi. Makanosaximilbej nejchaxoelpi: “Xan kaes pejme pachaeman. Me-ama asew jiw, jachi-enil” —aechpi, nejchaxoel wut. Xam makanosaximilbej kamta palalapi. Makanosaximilbej saxa afpi. Makanosaximilbej nabeyax wulwekpi. Makanosaximilbej xabich plata kanaxkal nejchaxoelpi. **8** Xam makanosaxaelampi ancianosliajwa, japi jiw chiekal bu'kulapi, asew jiw pat wut japi pejbachanxot. Japi nejxasinkpibej isliajwa pachaempoxan. Japibej majt chiekal nejchaxoelpi isaxaelpoxanliajwa. Japibej chajia xapaejas babijaxan isliajwa. Pe nakiowa, japi is-eli babijaxan. **9** Xam makanosaxaelampi ancianosliajwa, japi jiw Jesús pejwuajan chiekal naexasitpiyaxael, me-ama xatis majt naewuajnas, jachiliajwa japi jiw. Japawuajan kichachajba-el. Japi ancianos japawuajan naewuajan wuti, asew jiw, Jesús pejwuajan naexasiti, kaes xanaboejaxaeli Jesús. Asew jiwbej, majt nejweslapi naexasisliajwa Jesús pejwuajan, japibej naexasisaxael Jesús pejwuajan.

10-11 ¡Jasi poejiw xam makanosaxaelam ancianosliajwa! Creta tanaetpijiw xabich chiekal naexasis-elfuk xatis naewuajnas, Jesús pejwuajan. Japixot xabich judíos, jum-aech: “Judíos-elpi, naexasiti Jesús pejwuajan, japibej wewe'pas circuncidaliajwas Dios pejmarkaxliajwapi” —aechi asbuan jumch. Judíos japox kito'a wut, jumchi-el diachwuajnakolaxpox. Japi japox kito'a asbuan jumch jiw naekichachajbaliajwa, japoxantat plata kanaliajwa. Samata, judíos japoxan jum-aech xot, xabich jiw, judíos-elpi, kofa naexasitpox Jesús pejwuajan. Samata, xam buxfiasaxaelam japi judíos.

12 Kaen Creta tanaetpijin, xabich matabijsan, japon chajia jum-aech nakaetanaetpijiwliajwa: “Creta tanaetpijiw kichachajbamaenk. Xabich chachoelbejpi. Me-ama nuth chachoel wut, ja-aechi. Japi jiw xaemaenkbejpi. Kiwechabej” —aech chajia Creta tanaetpijin nakaetanaetpijiwliajwa. **13-14** Creta tanaetpijin jum-aechpox pejiwliajwa, japox diachwuajnakolax. Samata, xam Tito, ¡buxfia'e japi judíos naekichachajbasamatapi Creta tanaetpijiw, Creta tanaetpijiw chiekal naexasisliajwa Jesús pejwuajan! ¡Japi judíos fia'ebey naexasisfula-elaliajwa judíos pajut faekwuajan! ¡Japi judíos fia'ebey naexasislaliajwa, to'as

wut Jesús pejwúajan naexasis-eli! **15** Jesús pejwúajan naexasiti chiekal nejchaxoel taenpoxanliajwa, japoxantat pejnechaxoelaxan tabejsasamatas. Pe Jesús pejwúajan naexasis-eli, taen wuti babijaxan, japi nejchaxoel isliajwa japababijaxan. Ja-aech wut, pejnechaxoelaxan tabejtas. Japi matabija-elbej pachaempox. **16** Japi jum-aechbej: “Xan Dios matabijtax” —aechi asbuan jumch. Babijaxan is wut, puexa asew jiw matabija, japi Dios matabija-elpi. Japi jiw nejwesla naexasisliajwa Dios. Japi jiw xajupa-elbej isliajwa pachaempoxan.

**Pablo to'apox Tito naewúajnalijwa asew jiw,
Pablo majt naewúajanpoxan Titoliajwa**

2 Tito, xam naewúajnam wut Jesús pejwúajan naexasiti, ¡xam naewúajnamwúajan, japawúajan nej kaenejchaxoelax, chimiawúajan, Jesús pejwúajan súpich! **2** Xam naewúajnaaxelam poejiw, pakdiachowpi, chiekal pajut natataeflaliajwa isasamata pachaema-elpoxan asew jiwliajwa, asew jiw japi sitaeliajwasbej. ¡Japi pakdiachowpi naewúajandebej majt chiekal nejchaxoelaliajwa isaxaelpoxan, isasamata babijaxan! ¡Japi pakdiachow naewúajandebej chiekal naexasisliajwa xan naewúajnaprox, diachwúajnakolaxprox! ¡Japi pakdiachow naewúajandebej asew jiw nejxasinkaliajwapi! ¡Japi pakdiachow naewúajandebej, nabijat wut kofasamatapi Dios naexasitpox! **3** ¡Naewúajandebej watho', pakdiachowpi, chiekal duilaliajwa asew jiw japi watho' sitaeliajwas! ¡Japi watho' naewúajandebej bwxwúajanmaenkasamata! ¡Saxa feyaxan nejxasinkaxilpibej! ¡Japi watho' chiekal nej duile', asew watho'bej nakxataeliajwas! **4** Samata, ¡japi watho', pakdiachow, nej naewúajne' asew watho', kaes pansiachowpi, japi watho' nejxasinkaliajwa pamaljiw, paxibej! **5** ¡Japi watho' nej naewúajne' asew watho', kaes pansiachowpi, chiekal nejchaxoelaliajwa isaxaelpoxanliajwa, asax isasamata, pachaema-elpox! ¡Nej naewúajne'bejpi chiekal tataeflaliajwa pejbachanpijiw! ¡Nej naewúajne'bejpi watho' pansiachow naexasisliajwa pamaljiw, asew jiw jumchisamata babejjamechan Diosliajwa!

6 Tito, ¡xam naewúajande poejiw, pansiachow, chiekal nejchaxoelaliajwa isaxaelpoxan, japi isasamata babijaxan! **7** ¡Xambej chiekal dukde puexa pansiachow xam nakxataeliajwa! Naewúajnam wut, ¡chiekal naewúajande diachwúajnakolaxtat!

8 Naewuajnam wut, ¡naewuajande chimiajamechan, asew jiw xam wuljumchisamata! Xam asax is-emil wut, nadaelmajiw padalaxael nakjumchiliajwa babejjamechan, xatis naexasichpis Jesús pejwuajan.

9 ¡Naewuajandebej esclavos, japi naexasiti Jesús pejwuajan, chiekal naexasisliajwa puexa pejpaklochow tato'laspoxan, buxfafonasamatabejpi! **10** ¡Naewuajandebej esclavos, japi natkowasamata paklochow pejew! Ja-aech wut, esclavos bu'wuajanjilaxael pejpaklochowliajwa. Ja-aech wut, puexa jiw matabijaxael Dios nakbu'weyaxaelpox, diachwuajnakolax.

11 Xatis chiekal matabijas. Dios nakbeltaen xot, paxulan to'ak ampathatasik puexa jiw bu'welijawapon, japi naexasit wut Jesús pejwuajan. **12** Dios nakbeltaen xot, kofas babijaxan isaspoxan, wajut isasiaspoxan. Me-ama ampathatpijiw isful babijaxan, ¡nabej jachitis! Amwutjel, ¡chiekal nejchaxoelaxaes isaxaespoxanliajwa, babijaxan isasamatas! ¡Isfulaxaeslax Dios nakto'apoxan! ¡Sitaeyaxaesbej Dios, laelpas wut ampathatat! **13** ¡Jachiyaxaes, wuaj nawesfulas wut Jesús pasliajwa, me-ama Jesús nakjum-aech! Japon pask wut, xabich nejchachaemlaxaes. Jesucristolap Dios. Jawut japon itpaeyaxael pamamax, xatis nakbu'wia wut. **14** Jesús pajut natapaei asajiw jaelsliajwas, boesaliajwasbejpon, xatis nakbu'welijaw. Jatis wuton, xatis babijaxan isaspoxan nakwejl xatisxot, japon pejjiwaliajwas xatis isfulaliajwas pachaempoxan.

15 ¡Japoxanlap xam naewuajande Jesús pejwuajan naexasiti! Japi nejxaejwas wut, ¡xam naewuajande nejchachaemlaliajwa! Japi is wutbej isaxilpoxan, babijaxan, ¡xam japi fia'e, me-ama Dios pejjamechan jum-aech! Japoxanlap Dios xabich nejxasink xam isliajwam. ¡Nabej tapae' asew jiw xam mastaeliajwa!

Machiyaxaelpox, duil wut Jesús pejwuajan naexasiti

3 Xam Tito, ¡naewuajande naexasiti Jesús pejwuajan, japi naexasisliajwa gobierno lelpoxan, gobiernopaklochow tato'alpoxanbej! Naexasiti Jesús pejwuajan chiekal nejchaxoelaxael isliajwa pachaempoxan. **2** ¡Naewuajandebej naexasiti Jesús pejwuajan jumchisamata babejjamechan asew jiwliajwa! ¡Japi naewuajandebej nalosasamata, asew jiw suapich! ¡Naewuajandebej japi pachaemaliajwa, asew jiw suapich! ¡Naewuajandebej japi nejchaxoelaliajwa: “Xan kaes pejme

pachaema-enil. Me-ama asew jiw, jachi-enil” —chiliajwapi, nejchaxoel wut!

3 Xatisbej majt matabija-esal Dios. Naexasis-esalbejpon. Samata, ampathatat laelpas wut, chiekal napeltas Diosliajwa. Laelpas wut, nejmachbabijaxan isasias. Xatis majt nusa-siowlamaenkasbej asew jiw pejew, taens wut. Majt asew jiw naknejweslabej. Xatisbej asew jiw nejweslas. **4** Majt xatis jatis wut, Dios naktapaei matabijaliajwas nakbeltaen-pox, puexa xatis naknejxasinkpoxbej. **5** Dios nakbeltaen xot, nakbũ'wia. Dios nakbũ'we-el, isas xot pachaempoxan. Espiritu Santo nakkajachawaet xot, xatis pajelnejchaxoelaxan. **6** Jesucristo, nakbũ'weyaxaelpon, to'ak Espiritu Santo xatis wajmatpuatanxotaliajwa. **7** Dios nakbeltaen xot, xatis bũ'wũajanjisal babijaxan isaspoxanliajwa japonliajwa. Samata, pomatkoicha duilaxaes Diosxotse. Japoxlap xatis amwutjel wũajnawesfulas.

8 Japox diach chiekal wũajnakolax. Samata, ¡chiekal naewũajande puexa naexasiti Jesús pejwũajan isfulaliajwa pachaempoxan! Japoxan xabich pachaem puexa jiwliajwa. **9** Tito, ¡xam nabej bũxxandadũs, jiw nabũnlot wut wũajan pachaema-elpoxliajwa! ¡Nabej bũxxandadũsbej, judíos nabũnlot wut pejwũajnapijiw pejwũanliajwa! ¡Nabej bũxxandadũsbej, jiw nabũnlot wut Moisés chajia lelpoxliajwa! Puexa japoxan nabũnlot wut, pachaemaxil.

10 Aton naewũajan wut asawũajan jiw kofaliajwa diachwũajnakolaxwũajan, ¡japon aton xam bũxfia'e! Bũxkofsel wut, ¡pejme bũxfia'e bũxkofsliajwapon japox! Pe japon bũxkofsel wut naewũajanpox, ¡japon aton nabej tapae' kaes naewũajnalialjwa naexasiti Jesús pejwũajan! **11** Japon aton asawũajan naewũajan wut, xam matabijsaxaelam japon chiekal naewũajna-el Jesús pejwũajan. Ja-aech wut, japon aton pajut tasalaxaes babijax ispoxanliajwa.

Pablo to'apox Tito isliajwa we'ppoxanfuk

12 Xan to'axaelen Artemas xam poxade. Ja-el wut, to'axaelen Tíquico. Japon pa'a wut xamxot, ¡xabua'de Nicópolis paklowax poxade, jaxot xatis nafaekaliajwas! Japapaklowaxxot xan iama chatoepaxaelen. **13** Abogado, pawũlpon Zenas, Apolos suapich, japi thilt wut fulaeliajwa kaes atuaj poxade, ¡xam kajachawae'e

japi wewe'paspoxanliajwa! **14** Puexa naexasiti Jesús pejwɛajan matabijaxael kajachawaesliajwa asew naexasiti Jesús pejwɛajan, xabich wewe'pas wɛt. Kaen kajachawaes-el wɛt asew jiw, japon aton chiekal pachaema-el Diosliajwa.

**Pablo saludos xato'apox asew Jesús
pejwɛajan naexasitiliajwa**

15 Puexa xanxotpi saludos xato'a xamliajwa. ¡Nawesaludam jaxotpijiw, naexasiti Jesús pejwɛajan! Xan puexa xamalliajwa Dios kawɛajnax kajachawaesliajwapon.